

2. D. B.
RECTORE MAGNI
SERENISSIMO PRINCE

DN. FRIDERICO

ELECTOR. SAXON. HERED.

EXERCITATIONEM PHILOSOPHICAM
DE

ABRAHAM

MATRIMONIO

DISSIMULATO

Ex Genes. XII. 13. seqq. collata

IN

ILLVSTRI AD ALBERTUM

PRAESIDENTI

M. CHRISTIANO

FACULT. PHILOSOPHICAE

Die XVI. MAI. A. R.

IN AUDITORIUM

PUBLICUM DE

RESPONSE

SAMUEL SCHEK

S. THEOLOGICAE

VITEMBERGAE, FORMIS

D. B. V.
MAGNIFICENTISSIMO
PRINCIPE AC DOMINO
RICCO AVGVSTO
HERED. ETC. ETC. ETC.
PHILOLOGICO-MORALEM
DE
AHAMO
IMONIUM
MULANTE

qq. coll. cum Cap. XX. i. seqq.
IN
ALBIM ACADEMIA
R AESIDE
NO CAROLO Stempel
PHILOS. ADIVNCT.
AI. A. R. G. MDCCXIV.
TORIO MAIORI
CE DEFENDET
RESPONDENS
HEKEL, THAR. MISN.
HEOL. CVLT.

, FORMIS KREVSIGIANIS.

1714

BS 1235

.S74

1714

c.1

Rare



DE
ABRAHAMO MATRIMO-
NIVM DISSIMVLANTE.
PROOEMIUM.



Nter alia argumenta , quae
urgeri maxime solent , a qui-
bus interdictum lectionis Bi-
blica excommunicatorum
profectum esse novimus , il-
lud quoque haud postremo
loco praetextitur , quod divina volumina subin-
de enarrent lapsus , vitia , et infirmitates San-
ctorum , ex quibus , tum in fidei doctrina , tum
in vitae , ac morum praeceptis , Laici Alpha-
betarii anſam , et occasionem errandi accipere ,
et utrobique corrumpi facile poſſent. Hinc fa-
cultatem ſcripturam Prophetica , et Apoſto-
lica legendi non debere promiſcuae omni ge-
neri hominum indulgeri , aſſerunt , cum alio-
quin hoc ſit *ponere gladium in manu infantis* ,

lapidem offensionis proicere in via, ut labantur infirmi, interprete Nicol. Le Maire Part. I. Sanctuar. prof. occl. p. 80. vel, quod Stapleton. in Promptuar. Cathol. p. 199. ait, stultis, ac parvulis enses, et cultros committere. Imprimis vero quoad mores Scripturas putidis, ac curiosis Idiotis praecludendas, aut eripiendas esse suadent, quia in illis, praesertim in V. T. Historiis, sanctorum lapsus, et peccata factis dilucide commemorentur. Inde adeo Ebrietatem Noachi, incestum Lothi, et Thamaris, Polygamiam Patriarcharum, diffidentiam Moysi, homicidium, et adulterium Davidis, inobedientiam Ionaë etc. mirum quantum suggillant, hincque occasiones errorum, et malarum cogitationum suboriri, nec non periculum subesse, ne populus rudis provocetur, vel ad huiusmodi imitanda, vel ad Patriarchas, aliosque sanctos DEI homines contemnendos, nimis audacter pronunciant. Haut infimo vero loco Sanctorum delictis, lapsibusque, quos non ad imitationem, sed ad cautionem, et emendationem, in Scripturis divinis describi novimus, annumerandum quoque esse censent pactum illud Abrahami cum Sarai uxore, quod describitur a Mose Gen. XII. 13. seqq. ubi narratur, quale consilium

filium servandae vitae ceperit Abrahamus, quum Aegypto, fertilitate celebri, ex vocatione divina propinquus esset. Ibi enim, quoniam norat uxoris suae formam, irritando aliorum amoris idoneam, ad declinandam mortem, quam sibi ab Aegyptiis, quos uxor facile ad sui amorem allicere posset, inferendam metuebat, tale consilium init cum uxore, ut dicat, se eius esse sororem, dissimulet, se esse uxorem; finem consilii illius sibi proponit, non solum vitiationem mali, sed etiam adeptionem boni propter eam. Idem quoque altera vice *Gen. XX. 1. seqq.* fecisse legitur, ubi denuo, ut vitae suae consuleret, periculo eidem exponit conjugem suam, quam oculis Abimelechi, regis Gerar, forte placituram suspicabatur. In quo consilio, quoniam sunt nonnulla, quae in quaestionem veniunt, an facta fuerint ea prudentia, quae pium et sapientem decet, et annon in legem DEI impeggerit, operam non supervacaneam insumpturos nos esse existimamus, siquidem de eo paulo penitius dispiciamus, quod DEVS immortalis nobis iubeat bene evenire!

§. I.

Quantum ad utrumque locum attinet, negari non potest, eundem gravissime offendisse Patres, et Doctores omnes, et instar scopuli fuisse, ad quem multos hinc indeprehendimus impegisse. Sunt enim, qui nimis duriter hoc Abrahami consilium interpretantur, idemque, praeiudiciis variis abrepti, temerarie suggillant. Sunt, qui sanctissimum Virum, perfectissimum fidei exemplum, nullius plane hac in re peccati reum faciunt, et, in toto hoc negotio inhonestum quid animadverti posse, negant. Sunt denovo, qui eundem, quod una cum uxore consilium tale ceperit, factum quidem per se minus honestum iudicantes, laudibus tamen subinde efferunt. Contra sunt, qui etsi mitiores, et in pietissimum Patriarcham bene affecti, nihilominus veritatem ingenue profiteri, et, quae maxime culpari, et taxari possint, in hoc Abrahami facto offendisse videntur. Sententiarum extantiorum Syllabus de his luculenter testabitur.

§. II.

Prima, quae ex Patrum sententiis in censum venit, est ipsius *Chrysofomi*, quem citat *Sixtus Senensis Bibliothec. S. Lib. V. annot. 89.* qui factum hoc Abrahami adeo duriter exaggerat, ut pronunciet, Sanctissimum virum propter mortis timorem uxorem suam maluisse, voluptatibus donare barbaricis, et *Aegyptiae* tyrannidi, indeque ipsum in adulterium uxoris consensisse, et quasi serviisse adulterio in mulieris contumeliam, ut mortem effugeret. Saram autem, marito in mortis discrimen adducto, simulationem et adulterium persuadenti consensisse,

sensisse, etiam adulterio se exposuisse, et barbarorum tulisse congressum, ut maritum servaret. Vid. *Hemil. 32. in Gen. et Epist. ad Olymp.* Quam sententiam Patribus omnibus, et Theologis, inprimis Scholasticis adversari, ad Priscilianistarum haeresin inclinare, Apostolique monito *Rom. III. 8.* e diametro repugnare, ipse *Sixtus c. 1.* affirmat.

§. III.

Idem fere sentit *calumniator omnium Patrum V. T.* sicut ipsum appellat *Rivet. in Gen. Exercit. 73. Faustus Manichaeus*, ap. *Augustin. Lib.* quem contra eundem adornavit 22. c. 33. 44. et *Quaest. XXVI. in Gen.* qui, praeiudicio abreptus, Abrahamum, tanquam familiarem DEO commendatum, *infamissimum nundinatorem matrimonii sui* appellare non dubitat, qui, auaritiae, et ventris causa, uxorem suam regi in concubitum vendiderit; et hoc ipso divinam V. T. autoritatem convellere conatur, quod ipsum insignis temeritatis, et dementiae notam esse, iudicat *Augustin. l. c. conf. Loc. de Verbo DEI p. 136. seq.*

§. IV.

Ipse *Origenes*, ne factum hoc Abrahami damnare, et vituperare cogeretur, negavit, narrationem Mosaicam istius rei historice, et ad literam accipiendam esse, quia alioquin ipsi turpe factum, et mali exempli videretur; hinc locum suis allegoriis, pro more, quaerens in *Cap. VI. Genes.* Alioquin, ait, *quae nobis aedificatio erit, legentibus Abraham tantum Patriarcham non solum mentitum esse regi, sed pudicitiam coniugis prodidisse? Quid nos aedificat tanti Patriarchae uxor, si putetur contaminationibus exposita per conniventiam maritalem? hoc Judaei putent, et si qui sint amici literae, non spiritus.* Sed utrumque quod

quod ille historice sumtum non putavit, nobis prodesse ad praecautiorem, et ad misericordiae, et bonitatis divinae celebrationem, *Rivetius c. l.* recte observat.

§. V.

Duriores haecenus enumeratas sententias excipit quaedam mitior, ita tamen comparata, ut in omnibus probari non possit. Est illa Hipponensium Praefulus loc. modo cit. qui quidem, Abrahamum uxoris flagitio consensisse, negat, interim uxoris pudicitiam, quae utrum violaretur, etiam si quisquam carni eius commixtus esset, scrupulosius disceptari posse existimat, pro insigni sua erga DEVM fiducia, DEO tuendam commississe. Summa sententiae haec est: Abrahamum, in Aegyptum, ex vocatione divina, proficiscentem, inter duo pericula, et vitae propriae, et pudicitiae uxoris, fuisse constitutum, unum, quum honestam elabendi viam reperiret, praecavisse, alterum vero DEO commendasse; idque haut imprudenter ab ipso factum fuisse existimat, quandoquidem de eo adhuc disputari posse dicit, utrum licitum haud sit adulterii remedium, vel marito, vel uxori, vitandae alterutrius necis causa? Provocat hanc in rem ad Exemplum, quod Antiochiae, Constantino imperante, accidisse memorat, ubi uxor caritate mariti alicuius, ob ingens aliquod debitum, quod praestare non poterat, occidendi, commota, unius noctis congressum, idque suadente, et permittente marito, opulentiori cuidam, eundem anxie poscenti, debitumque mariti solvendum promittenti, nequaquam fidem deferens coniugalem, et potestatem non abnuens maritalem, vendiderit, ad vitam mariti redimendam.

dam. Quod quidem minus recte factum fuisse, neque hodiernum licere, existimat *Augustinus*, in eo tamen vix excusari posse videtur, quod in re quadam, Sacris humanisque literis ac exemplis dudum comprobata, dubitare voluerit. Neque, si rectius examinetur, alicuius momenti est ratio, quam ad praevisam objectionem, DEO nempe utrumque, in quo constituebatur Abrahamus, discrimen committi debuisset, praetexit: DEVM scilicet hoc ipso tentatum maxime fuisse, eo quod res duae tuendae, et Abrahami vita, et uxoris pudicitia, hac ratione ipsi fuerint commissae, quarum una tamen ab ipso Abrahamo praecaveri facile potuisset. Si enim ita praecaveri potuisset, ut ex ipsa praecautione, Abrahami industria facta, non aliud ortum fuisset malum, periculum scilicet infamiae uxoris, et mala illa duo incurrentia ita fuissent comparata, ut unum illorum Abrahamus praecavere, alterum autem, ne quidem omni adhibita industria vitare potuisset, facile daremus, prudenter hactenus ab Abrahamo factum fuisse, quod et DEO commiserit, quae declinare ipse non poterat, ipse tamen quoque fecerit, quantum in se fuerit, ut ab omni proinde tentationis suspicione liberaretur. Longe autem aliud in Abrahami consilio apparet: Namque ex ipso, quem quaerebat, praecavendi modo, ortum fuit manifestum illud infamiae uxoris periculum, quae, ob dissimulatum matrimonium, facile libera putari, et eo facilius ambiri a rege potuit; accedit, quod utrique, in quo constitutus Patriarcha erat, timori, tum mortis, tum infamiae uxoris, uno fidei in DEVM actu, unicaque illa petitione, ut, quod facile fuisset DEO, efficeret, ne uxor, quamvis formae elegan-

tia excellens, a quoquam appeteretur, praecurrere facili negotio potuisset. Hac enim in DEVM fiducia usus, forte impetrasset, ut DEVS Aegyptiorum oculos a pulcritudine uxoris appetenda avertisset, ipseque proinde, vel uxoris causa, vel ulla alia, in vitae periculum non incurrisset. Plura hanc in sententiam dabit *Rinet. Exercit. 73. in Gen.*

§. VI.

Missis Patribus, illos nunc recensuisse iuvabit, qui conventionem hanc coniugum non quidem cum Iudaeis insanientibus praecise damnant, quaedam tamen in eadem deprehendi putant, quae iusta quaedam, piaque excusatione digna videantur. Quos inter principe loco sisto B. Megalandrum *Lutherum*, qui *Comment. in b. l.* Iudaeos quasi Stoicos, h. e. septies asinos reprehendit, quod adeo duriter hoc factum interpretentur, ac Abrahamum tanti peccati reum faciant, ut dicant, captiuitate Aegyptiaca id punitum fuisse in posteris. Ceterum in eo totus esse videtur, ut Sanctissimi viri factum sobrie, ac reverenter exculet, idemque ex firmissima fide, imo ex ipso Spiritu S. profectum fuisse, pronunciet. Ipsum enim Abrahamum plenum fide, etsi pericula varia viderit, tamen in solam respexisse promissionem, quam sibi, et suo semini factam, et veluti in corpore suo positam, animadverterit. Hinc omnia eum potius, utpote familiam, substantiam, tandem uxorem quoque periculo exponere, quam vitam temere profunderi, maluisse, quam DEO recte commiserit, et tamen media non neglexerit, quibus eandem tueri posset. Et ita ipsum regia incesisse via existimat. Multa praeterea in medium affert, quibus defende-

re Arāhamum fatagit, et tandem concludit, Spiritum S. etiam hoc in loco voluisse nobis proponere excellentissimum fidei Exemplum, quo admoniti nos quoque disceremus firmiter inniti promissioni DEI, et urgere eam etc.

§. VII.

Franciscus Iunius in Cap. XX. Gen. consilium Abrahæ in sola dissimulatione positum fuisse affirmat, quippe quæ cum generis sit medii, et talis a bonis omnino probetur, quæ sine iactura veritatis, pietatis in DEVM, caritatisque in homines, et aedificationis, etiam in rebus indifferentibus, adhibetur, recte quoque in Abrahami consilio, et facto deprehendatur, a quo, neque contra veritatem, neque pietatem, neque etiam caritatem communem, sed singularem tantum peccatum fuerit vocationem, qua ipse, et uxor inter se constricti erant, ita, ut ex eo peccato caritas publica periclitata sit. In qua quidem sententia illud prae caeteris taxandum videtur, quod Abrahamum non nisi dissimulatione peccasse pronunciet, quam quidem non plane cum *Cicer. de Offic. III. ex omni vita tollendam* existimamus, interim tamen in Abrahamo neque excusabilem, neque solam, sed multis praeterea peccatis aliis coniunctam, deprehendimus, de quibus infra pluribus constabit.

§. IIX.

Cocceius Comm. in Cap. XII. Gen. irrideri hoc consilium a quibusdam pronunciat, quasi Abrahamus magis fuerit de vita sua sollicitus, quam de uxoris pudore, neque satis fuerit confisus DEO. Quod si verum esset, exemplum infirmitatis in Patre fidelium id fore, asserit. Sed constituisse pio viro consilii sui

rationem, putat, quippe qui hominum consilium de se interficiendo, praevenire voluerit. Quod si autem servaretur propter uxorem, habitam pro sorore ipsius, et hominum fauorem experiretur, qui nempe fratrem colerent propter sororem, et fratris gratiam aucuparentur: vidisse, se vixum aliquid praestare posse, ad conservandam uxoris pudicitiam. Neque diffidentiae esse dicit, si, qui fretus sit divina veritate, et bonitate, et potentia, nihil agat temere, et nihil negligat agere, quod ad salutem expedire, et ad periculum evadendum utile esse possit, quandoquidem, qui talia negligat, DEVM tentet. Quae sane sententia approbari posset, nisi manifestum foret, Abrahamum utique tum diffidentia in DEVM hic peccasse, tum vitae periculum, quod ipsi imminebat, cum elabendi viam videret, illicita quadam ratione evasisse, quam sane citra suspicionem alicuius tentationis negligere debuisset.

§. IX.

Caietanus scribens in *b. l. cit. Riveto l. d.* cum Doctoribus sacris, factum illud, si nihil aliud intervenerit, praeter id, quod narratur, facile excusari posse existimat; nullam enim dicit, mentionem fieri, Abrahamum consuluisse, ut in matrimonium cum alio consentiret, sed instruxisse Saram tantum, ut taceat, se esse coniugem, et manifestet, se esse sororem. Praeterea observat, de Sarai tantum dici, quod in domum Pharaonis fuerit sublata, cuius verbum postea subiungatur: *Et tuli eam mihi in uxorem;* ad quam rem non necessarium fuisse, dicit, expressum Sarae in novum coniugium consensum, cum sufficeret, si absque reluctatione permitteret, se duci tanquam futuram coniugem Pharaonis,

nis, hoc praesupposito, aestimatum fuisse, Sarai et Abraham pro magno beneficio hoc habere, *quia hoc facta prae se ferebant.* Quae ultima *Caetani* verba, quod recte observat *Rivetius*, non dant locum iustae excusationi. Si enim facta Abrahami, et Sarai prae se ferebant, eos pro magno beneficio reputare, si Sarai a Pharaone duceretur, certe factis suis occasionem dederunt periculo, et Pharaonem pene induxerunt ad illud facinus perpetrandum. Quod si utrique coniugum fiduciam aliquam, quod putat, in DEVM tribuere velimus, qua praeviderit, fore, ut prohiberet malum, antequam coniugium novum iniretur, id non adeo bene fieri posse idem *Rivetius l. c.* existimat, cum talis fiducia in facto speciali, sine singulari promissione reuelata, certa esse plane non potuerit.

§. X.

Pluribus interpretum sententiis ad h. l. recensendis non immoramur, omnes enim, quae supersunt, fere ita comparatae sunt, ut ex iis, quae hactenus in medium allatae fuerunt, facile de illis iudicium ferri queat. Ordo iudicandi, et censendi nunc nos ultro tangit, quid in facto hoc Abrahami excusari, quid culpa-ri mereatur. Quod ut eo accuratius, reverentiusque fiat, quaedam praegustasse hic iuvabit, quae forte nos in meliorem totius rei cognitionem deducere poterunt.

§. XI.

Primo omnium de eo disquiri meretur, qui fieri potuerit, ut Sara verula, et anus quendam ad sui amorem pelliceret? Nam ut demus, formae elegantia eandem prius excelluisse, anni certe, quorum usque ad 65. iam pervenisse legitur, gratiam omnem, et leporem detraxerant, et scimus, quantum seniles ru-

gae optimas, et pulcherrimas quasque facies deformant. Mirari itaque subit, quomodo Abraham metuere potuerit, ne propter uxoris, t. t. plus quam sexagenariae, pulcritudinem ab ambientibus periculum ipsi immineret? Non satisfaciunt quaestioni, qui coniectant, Saram, non tam elegantia formae excelluisse, quam matronam, raris virtutibus praeditam, fuisse, indeque respondent, eandem soli Abrahamo pulcram extitisse; hunc enim more amantium, qui hac in re saepe falluntur, etiam in eo falsum esse perhibent, quod Saram, etiamsi deformem, et vetulam, pro pulcra tamen reputaret. Novimus enim, non solius Abrahami, sed et aliorum oculis eandem placuisse, quod ex *Gen. XII. 14.* constat. Neque, qui cum Iudaeis fabulatoribus sentiunt, qui Saram conclusam in arcam, et a telonariis inventam, et adductam ad regem esse, somniant, quae recte inerudita, et Iudaeis autoribus digna, cum *B. Luthero C. in G.* pronunciamus. Nec denique, qui formam Sarai, non nisi comparate ad Aegyptios, tribuunt, quos fuscos, et fere deformes, proinde in exoticas formas, et candidiora orientalium corpora, magis intentos esse, asserunt. Sarai enim non Aegyptiis tantum, sed et postea Palaestinis pulcra fuit, quam ob causam ab Abimelecho iterum rapta fuisse *Cap. XX.* legitur. Et scimus, aetatis longe maiorem, quam formae, commendationem esse; illam enim probari novimus, etiamsi forma minus probata sit. Causas itaque alias huius pulcritudinis, hasque potissimum, allegare liceat, ita, ut dicamus (r) vigorem corporis, sicut hodie, ita tunc quoque formam Sarai sustinuisse. Dubium enim non est, quin eo tempore natura fuerit vivacior, atque robustior, viresque

que non adeo fractae, et debilitatae, quam nunc, in ipso quasi senio mundi, sunt: Sicut enim paulatim accrevit malitia, ita et dona ista, quibus DEVS ornat pios, decreverunt. Fieri itaque optime potuit, ut tum sexagenaria foemina, et forma, et vigore, aequaret eam, quae hodie est triginta annorum. (2) Adjuvata praeterea dicamus Sarai ab natura, ut formae decor, etiam in aetate devergente, integer maneret. Sterilem enim, nec tum frequenti liberorum gestatione, et lactatione, tum doloribus, et laboribus partus, debilitatam, ac exhaustam fuisse, compertum habemus. Servare itaque eo facilius formam integram, totumque corporis habitum, eorumque proinde opinionem in aetate declivi fallere potuit, quibus eiusdem aetas non adeo cognita fuit: Respondent alii, praestantem formam in Vetula Sara fuisse miraculum, et singulare DEI donum, qui eam in ipsa senectute matrem Isaaci destinaverat, et interea regem Aegypti Abrahae conciliare volebat, ut hac occasione etiam inter gentes promissio de futuro semine innotesceret. Addit denique *Rivet. loc. supra cit.* esse quandam venustatem, quae pulcritudinis partem faciat non minimam, quae aetate, et senio non tollatur, quaeque aliquando magis afficiat, quam decus illud ex coloribus, lineisque congruentibus conflatum, quae omnia tunc adhuc in Sarai concurrisse, existimat. *Conf. Humm. Tom. III. Opp. Lat. p. 1530. et Gerb. Comm. in G.*

§. XII.

De forma itaque Sarai vetulae cum satis constet, factum, et conventionem coniugum ipsam examinare, et imprimis quaerere h. l. liceat: an deliquerit in eo
uter-

uterque, quod Abrahamus suaserit uxori, ut mendacium proferret, petendo ab ea, ut se sororem eius, non uxorem, profiteretur. Sarai vero in consilium et pactum hoc consenserit? Disputant de hoc mendacio inter se *Hieronymus* et *Augustinus*, hic quidem triplex faciendo mendacium, *iocosum*, *officiosum*, et *pernitiosum*, quod discrimen, etsi non satis proprium, propter Patrum reverentiam tamen retinendum esse, existimat *Lutherus C. in G. Cap. XII.* statuitque, mendacium Abrahami fortasse excusari, et officiosum, proinde dignam laude providentiam appellari posse, vel ideo, quandoquidem per illud, neque Abimelech, vel Pharaon, in suam perniciem, nec commodum ipsius Abrahami falsus fuerit; hoc enim peccatum ab Abrahami consilio abfuisse, qui, quantum potuerit, prudentia gubernarit fortunam suam inclementem. Alibi tamen *Tom. I. Isleb. p. 284.* peccasse Abrahamum mendacio, affirmat: Abraham that auch eine solche Lügen/ da er sein Weib für dem König Abimelech nennet seine Schwester. Darauf soll man antworten/ daß/ ob die Christen wohl den heil. Geist haben/ so haben sie doch auch noch Fleisch und Blut an ihnen/ so hengen und kleben an ihnen auch noch viel Sünde und Gebrechen/ darum sie immerdar beten müssen: Herr vergieb uns unsre Schuld. Und ob die heiligen Gottes unterweilen zu viel/ oder zu wenig thun/ so gehets doch mit dem Hauffen/ und Menge der Vergebung der Sünden hinweg/ und gehöret unter den Himmel der Gnaden/ das ist/ unter die Vergebung der Sünden. Et in *Comm. ad Cap. XIX. Gen.* ingenue fatetur, Abrahamum mentitum fuisse, uxorem-

uxoremque , ut mentiretur , docuisse , quae tamen peccata in Sanctis venialia pronunciat.

§. XIII.

Ex *Riveto Exercit. 73. in Gen.* discimus , quod ipse Abrahamum nullius mendacii reum pronunciet , eo quod ab uxore non exegerit , ut interrogantibus , num uxor ipsius esset ? se esse negaret ; noluisse quidem , ut veritatem Sara profiteretur , sed tamen , ut aliquid contra veritatem diceret , non suasisse . Proinde in verbis Abrahami , non veritatis abnegationem , aut falsi affirmationem , utut eiusdem veritatis , quam nocituram sibi putavit , utpote in tempore , et loco licitam , dissimulationem , atque occultationem deprehendi , existimat . *Certum est* , inquit , *Abrahamum noluisse , ut Sara profiteretur omnem veritatem , sed tamen , quantum quidem e verbis possumus colligere , non suavit* , ut aliquid contra veritatem diceret . Quod verum erat , dixit , se esse Abrahami sororem ; quod etiam verum erat , tacuit , se esse Abrahami uxorem . Quod si Abrahamus exegisset ab ea , ut interrogantibus , num uxor ipsius esset ? negaret se esse , tum certe excusari non posset a mendacio . Proinde in verbis Abrahami est quidem veritatis , quam sibi nocituram putavit , dissimulatio , sed non est veritatis abnegatio , aut falsi affirmatio . Talem autem dissimulationem in tempore , et loco licitam esse , nemo est Theologorum , qui neget , nec qui putet , quemlibet ubique teneri omnia propalare , quae ad se spectant , aut conditionem suam profiteri .

§. XIV.

Nos ut in ferendo hac de re iudicio feliciter pedem promovere queamus , de eo operae pretium existimamus disquisivisse , an Abrahamus uxori suaserit mendacium , cum petit , ut diceret : fratrem esse , se-

que, esse illius sororem? Id saltem negasse Abrahamus videtur apud Abimelechum *Gen. XX. 12.* cum enim ab eodem interrogaretur, cur eum fefellerit? respondit, Saram et vere sororem suam esse, filiam patris sui, non vero filiam matris suae, quam duxerit in uxorem. Quaestio itaque de eo nuncerit: utrum haec verba proprie, et ut sonant, accipienda sint, ita ut Sara vere fuerit Abrahami foror *ὑποπατρεις*, h. e. ex eodem Patre, non vero ex eadem matre genita? quod volunt quamplurimi, et sigillatim *Caiet. ap. Rivet. l. c.* An vero fuerit privigna Haran, et post huius mortem in domum Thare translata, ibique educata, atque hinc eius filia, et Abrahami soror appellata? quae sententia est *Lutheri in C. ad Cap. XX. Gen.* quorsum et respicit *Chrysostomus Comm. in S.* Vel an fuerit eius privigna, vel alio aliquo modo foror Abrahami? quod ipsum, si concedatur a nobis, Abrahamus facile a suspicione insimulati mendacii poterit liberari.

§. XV.

Tam variantes vero hic deprehendimus autores, ut vix appareat, in cuius vestigio pedem figere debeamus. Sunt enim, qui putant, Abrahamum, quod ipse fatetur, non quidem uterinam, propriam tamen, et ex eodem patre progeneratam, sororem, duxisse in matrimonium, quibus ab aliis obiicitur locus *Levit. XII. 11.* in quo filia patris dicitur esse in gradu consanguinitatis prohibito, ut adeo credendum hactenus non sit, Abrahamum pium, et fidelem, cum uxorem duxit, voluisse incestis nuptiis implicari. Sunt denuo qui Sarai, non ratione generationis, sed vel affinitatis, vel adoptionis, filiam Therah pronunciant, a quo tanquam Harani privigna fuerit adoptata;

ta; quo ipso omnis quidem difficultas, et disputatio praelescinderetur, si ex Scripturis haec sententia demonstrari posset. Sunt denique, qui ad varias illas Catachreses, quas vocabulum Soror aequae ac Frater habet, et recensitas vide ex *Hieronymo ap. Flac. in Clav. Scr. in Voc. Frater*, se recipiunt, existimantes, Sarai fuisse Abrahami sororem, h. e. ex eodem sanguine, etsi non immediate, progenitam, quia, ut putant, fuerit Lothi soror, et Haranis filia. Fuisse igitur sororem ex eodem Patre, aut Patris Abrahami filiam, vel, quia Thareh ipsi avus erat; notum autem esse, avos etiam simpliciter Patres nepotum appellari; vel, quia Patre ante avum defuncto, ipsi fuerit avus loco patris etc. *conf. Rivet. l. c.*

§. XVI.

Id nobis textui convenientissimum videtur ut asseramus, Saram sororem Abrahami veram, non tamen uterinam, extitisse; a proprietate enim verborum hic recedere velle, nobis religio est. Dum enim aperte proficitur Abrahamus, Saram sororem suam esse, filiam patris sui, non matris suae, quid quaeso clarius hactenus pronunciari poterat, quam, Saram filiam patris sui, non autem avi, aut fratris sui esse? Neque est, quod *Bellarminus Lib. de Matrim. Cap. XXVIII.* urgeat, coniugium tale cum sorore initum illicitum esse, *Si Abraham, inquit, et Nachor accepissent germanas sorores, id fecissent, quia illo tempore per mores illarum gentium id licuisset. At si tunc, et per legem naturae, et per mores gentis, licuisset tale coniugium inire, nihil profuisset Abrahae dicere, Soror mea est, id enim dixit ad tegendum coniugium Gen. XII. 20. Oportet igitur fateri, homines illorum locorum ita horruisse coniugium cum propria sorore,*

ut, audito nomine sororis, statim crederent, eam non fuisse uxorem. Denique quis credat, Abrahamum sine ulla necessitate duxisse propriam sororem, cum propter hoc crimen DEVS infferit Levit. XX. 17. utrumque coniugum simul necari? Novimus enim, quod quidem matrimonium tale cum sorore agnata i. e. ex eodem patre, sed non ex eadem matre, quam ἀδελφὴν ὁμοπατέρα, Stieffschwester appellamus, postea Levit. XIX. fuerit prohibitum; recurrendum tamen nobis hic existimamus ad divinam dispensationem, ex post facto secutam, quam ex eo colligimus, quod Abraham non minus, quam filius Isaacus, et nepos Iacobus, non ex filiabus Chanaan, sed ex cognatione sua uxorem ducere debuerit Gen. XXIV. 3. et Cap. XXVIII. 2. Ex qua speciali dispensatione generalis regula, de non ducenda sorore, nequaquam evertitur, nec Iuris divini prohibitio labefactatur. Idem dicimus de Dāvidis cum Bathseba coniugio, quod, etsi initio legitime non fuerit contractum, interim tamen, post actam a Davide legitimam poenitentiam, divinitus fuit approbatum, ita, ut ex eo natus sit Salomon, per quem Christi Genealogiam deducit Matthaeus Cap. I. 7. Nec ullius momenti est, quod excipit Bellarm. l. c. Cap. XXVII. §. Ex quo falsum etc. Quis credat ex illegitimo, et incesto coniugio voluisse DEVM excitare heredem Abrahae, ex quo Messias nasciturus erat? Num enim excidit ipsi incestus concubitus Iudae cum nuru sua Thamar, ex quo natus est Phares, quem constat inter progenitores Christi numerari? Gen. XXVIII. 16. Mat. I. 3. notum enim est, quod in Genealogia Salvatoris eae assumantur mulieres, quas Scriptura reprehendit, ut, qui propter peccatores venerat, de peccatoribus nascens, omnium peccata

cata deleret, quod recte iudicat *Hieron. ad Cap. I. Math.* Permissum itaque a DEO Abrahamo fuisse putamus, ut ipse, quoniam cum alienigenis se coniungere non debebat, e cognatione sua uxorem duceret, quamvis in eo gradu, qui alias, extra casum necessitatis, et divinam dispensationem, non liceret. Respondent alii, leges illas *Levit. XVIII. et XX.* de prohibitis matrimoniigradibus extantes, tunc temporis nondum fuisse latas, potuisse itaque utrumque coniugum hanc prohibitionem ignorare, quomodo manifestum sit ignorasse in Polygamia, maxime vero, cum uterque fuisset idololatra: Nam Abrahamus Saram duxit, antequam exiret ex patria. *conf. Gerhard. Tom. VII. LL. CC. Loc. 28. 7. de Coniug. p. 314. et Cham. Tom. III. Panstr. L. 18. C. 9. n. 15. et 33.*

§. XVII.

Tutiorē hac, quam hactenus asservimus, sententiam eorum esse, iudicat *Rivet l. c.* qui censent, Sarai fuisse neptem Abrahami ex fratre, eandem, quae *Ischa* nominatur, ideoque sororem eo sensu, quo fratrum, et sororum nomine in genere censentur, qui sanguine sunt proximi, quo etiam Christo in Evangelio assignantur, appellari. Quemadmodum enim Nachor duxerit uxorem fratris filiam, sic idem fecisse Abrahamum, et maxime probabile putat, eam fuisse sororem Melchae fratris uxoris, eandem, quae vocata est *Ischa*: Argumento id prae ceteris esse existimat, quod cum historia sacra dixisset, Abraham et Nachor duxisse uxores, uxorem Abrahae fuisse Sarai, uxorem Nachor fuisse Melcham, filiam Haranis, addat: *Patris Melchae, et patris Ischae, et Sarai erat sterilis.* Vbi nullam monet apparere rationem, cur post mentionem duarum ux-

orum, duorum istorum fratrum, additum fuerit nomen duarum filiarum Haranis, quarum una nupsit Nachoro, nisi ambae illae sorores duobus fratribus coniunctae fuissent. Quam vero rationem non valere putamus, eo quod non nisi aliqua coniectura ex Scripturis extorta, innitatur. Ex eo enim, quod additur, *Patris Melchae, et Patris Ischae*, nullus alius, quam is, exculpi potest sensus, Haranem fuisse patrem Melchae, et sororis eius *Ischae*, adeoque duas filias habuisse, quarum alteram duxerit Nachor, *conf. Katabl. in Annot. ad h. l. p. 25. et Lun. in not. ad eund. loc. p. 20.* Nulla vero apparet ratio, et causa, cur alteram, scilicet *Ischam*, obtrudere velit Abrahamo *Rivetius*; nec enim, ex verbis illis, quae dicit immediate subiici: *Et Sarai erat sterilis*, id confici posse, putamus, Sarai, et *Ischam* pro una eademque filia Haranis habendam esse. Non enim legimus unquam postea, ubi agitur de Sara, *Ischae* huius fieri mentionem; et si, quod probabile esse iudicat *Rivetius*, ea sic fuit vocata, antequam nuberet Abrahamo, ubi nomen Sarai tanquam Dominae ipsi inditum fuisse somniat, sequeretur sane, Melcham, uxorem Nahoris, fratris Abrahami, etiam aliud sortitam nomen fuisse, cum nuberet Nahori, de quo utroque in Scriptura *מלכה נשואה* extat. Et quamvis silentium Scripturae, quae nunquam postea *Ischae* mentionem iniiciat, sententiae suae patrocinari existimet *Rivetius*, eo quod semel obiter mulieris, alioquin incognitae, meminisset Moses, eiusque patrem designasset, quod, nisi Sarai per eam denotetur, frustra, et in gratiam nullius factum fuisset; vix tamen eo adduci quemquam posse, putamus, ut credat, voluisse Moysen nomen Sarai sub nomine

Ischae

Iſchæ occultare, cum nulla appareat ratio, quo minus *Iſchæ*, utut non adeo frequenter in Scripturis memorata, pro filia quadam Haranis, ab ipsa Sarai distincta, habeatur. Nec ignorare quis potest, plurimum mulierum subinde in Scripturis mentionem fieri, quarum nomina a nobis ignorari aequa mente possent, nisi summa Numinis divini sapientia eadem sapienti consilio Codici Biblico inserta voluisset, quem una cum iisdem religiosissime veneramur. Quod ultimo loco urget *Rivetius*, si Sarai fuisset immediate filia Thareh, cum longe maior sit necessitudo patris, et filiae, quam soceri, et nurus, non appellasse Moſen Saram nurum Thareh, sed potius filiam eius, cum dixit *Cap. XI. 31. Deinde sumſit Therach Abrahamum, filium suum, et Lothum, filium Haranis, filium filii sui, et Sarai nurum suam, uxorem Abrahami filii sui*, illud nos non ferit, quandoquidem, si Sara filia Harani, et cum *Iſchæ*, sorore Melchæ, una eademque fuisset, id procul dubio dixisset Moſes, aequè, ac pronunciauit, Lothum esse filium filii Thareh, nempe Haranis. Ut taceamus, quod, quia Sara Abrahamo iam coniuncta erat, pro more, hodiernum usitato, rectius nurus, quam filia Thareh, appellata fuerit, cum in familiam Abrahami iam transiisset, quae tamen denominatio necessitudinem patris, et filiae, quam illa soceri, et nurus maiorem esse, lubentes concedimus, nequaquam tollit.

§. XVIII.

De Sarai itaque hætenus dubium non est, quin propria, licet non uterina, Abrahami soror fuerit, id quod ipse Abrahamus confitetur, et a nobis fundamenti loco superſterni debuit narrationi ſequenti, de utriusque

usque coniugis pacto, et conventione. Mirari autem nunc aliquis poterat, quo iure pientissimum Patriarcham alicuius mendacii insimulemus, qui tamen, quantum ex verbis possumus colligere, non suavitati uxori, ut aliquid contra veritatem diceret, neque ab eadem exegit, ut interrogantibus, num uxor ipsius esset, negaret se esse, aut falsum affirmaret, quod si fecisset, a mendacio nullatenus excusari posset; sed prudentiorem hactenus in eo se exhibuisse videtur, quod veritatem, quam nocituram sibi putabat, dissimulavit, id quod in tempore, et loco licitum esse, nemini ignotum esse potest. Quare, ut dicamus, quod res est, negari nostro iudicio nulla ratione potest, Abrahamum aequivocationi favisse, uxoremque suam in mendacium induxisse. Res tota ex animo, et intentione Abrahami aestimanda venit, quae nulla alia fuit, quam ut regi fidem faceret, Saram non esse uxorem, sed sororem suam. Quaesitum enim regem suspicabatur de tali foemina, quam ipse sine peccato ducere posset, qualis non erat Soror in generali sensu, quo etiam uxor esse poterat. Licet itaque non legatur negasse, Saram esse uxorem, (quod urget tantopere *Rivetius*) verba enim quod verum erat, exterius significabant; certum tamen est, eundem iuste percontanti aequivoce respondisse, et opinionem per se fallacem animo iniectisse, quod recte iudicat *Dannbauer Colleg. Decal. Disp. VI. Quaest. I. p. 455*. Hinc et verba eius aequivoca fuisse, alioque sensu, si de eo, quod tamen subodorari non poterat Abrahamus, praecise interrogatus fuisset, accipi potuisse, ipsemet *Rivetus* non diffitetur. Eo autem iure divino adstrictus erat, ne daret falsum testimonium, h. e. ne aequivocatione

9
eatione uteretur, ad proximum fallendum, quia tamen Ægypti rex deceptus fuisse, legitur, quo de etiam *Cap. XII. 18.* maxime conqueritur. Addo, quod et ipse Abrahamus postea convictus fateatur, se parum bona fide egisse, quod, dissimulato uxoris vocabulo, sororem suam appellari iusserit, idque eo consilio, ut suum cum eadem coniugium lateret regionum earum incolas, apud quas peregrinabatur, *cogitavi, inquit, mecum, dicens, forsitan non est timor DEI in illo loco; et interficient me propter uxorem meam; alias et vere soror mea est; filia patris mei; et non filia matris meae.* Omnino itaque peccasse censendus est Abrahamus, et quidem iterato, satisque graviter, imo, quod vult *Stegmann in Anti Phot. Disp. XLII. Qu. II. ad I. p. 485.* mortaliter, dum contra mandatum Domini falsum perhibuit de Sarai uxore testimonium, eamque sororem suam mentitus est. Neque vero Homonymia vocabuli sororis eum potuit excusare; bis enim peccat, qui mendacium, sub veri specie, alteri studiose obiicit. De eo ipso rogabatur, an Sara esset uxor, ideo noverat, responsum eius, quod sit soror, ab interrogantibus sic accipi, quod non sit uxor. Mirari itaque subit, cur *Rivetius* Abrahamum a mendacio commisso liberum prorsus pronunciare audeat, qui tamen partim ex nocendi, decipiendive cupiditate, partim ex ingenii vanitate citra probabilem, honestamque causam, contra conscientiam, legitur falsum protulisse, quae omnia pro veris mendacii notis haberi commode possunt. Neque Abrahamus ideo mendacii labem effugere potest, quod veritatem, Saram scilicet uxorem esse, negasse, expresse non legatur; suffi-

cit tamen, quod eandem pro uxore sua, qualis tamen tunc erat, ab ipso rege, quem ex maxime deliberato consilio fefellit, haberi noluerit. Et quamvis postea excuset, se non mentitum esse, nec aliud finxisse, quam res habebat, id tamen praecipue intendisse, constat, ut mendacium specie veri obiiceret regi, non praecipitanter mentiendo, sed meditando mendacium, quod ipsum peccati gravitatem auget. Tantum itaque abest, ut hoc prudentiae alicuius exercitium cum *Riveto* appellemus, ut potius cum *Gerbaro Com. in b. l.* hoc ipsum consilium ex prudentia carnalii profectum, et simulationi huic, ad quam inducit Saram Abrahamus, aliquid inendacii admixtum esse, asseramus, id quod vel ideo affirmandum esse videtur, quandoquidem alias, quod etiam praevidit facile *Rivetus*, ab exemplo Abrahami Apologia pro aequivocationibus Scholasticorum, et Jesuitarum, eorundemque reservationibus, quas mentales vocant, quasque ex ipsis nonnulli non solum mendacii, et periurii, item rebellionis, et prodicionis, sed etiam abnegatae religionis, et Atheismi accusant, mutuo accipi facile posset, quibus semel admissis, ad omnem perfidiam, et in Politia, et in religione, portam patere, ipse *Rivetus* pronunciat. Summa itaque urgendorum haec est: quod ipse Abrahamus, cum petit, ut Sarai se sororem eius profiteretur, voluerit, ut inde inferrent Aegyptii, ipsam non maritatum, sed solutam esse. Cum autem id voluerit celare Aegyptios, sequitur, voluisse eos censere, Saram esse liberam, atque ita posse ab alio ambiri, atque duci, sine crimine adulterii, in spem vero adduci, vel regem, vel ex magna-

magnatibus aliquem, se ea, sine discrimine, saltim atroci, potiri posse.

§. XIX.

Quid si porro nunc affirmemus, consiliū Abrahami ex praepostero vitae amittendae metu profectum esse, proinde excusari sanctissimum virum in eo vix posse, quod de Aegyptiis, nondum notis, sic male fuerit suspicatus. Fieri quidem potuit, ut Aegyptus esset infamis apud vicinos, propter tyrannidem; habebat enim potentissimum regem: Vbi autem magistratus verbo DEI non gubernatur, fere ad tyrannidem abutitur potentia. Haec igitur tentare animum Abrahami potuerunt, ut sibi metueret, et de periculi ratione, vel corrigendo, vel vitando, cogitaret. Sed quaeritur, an iustum, et prudens fuerit, ita consulere vitae suae, ut non modo uxoris pudicitiam in discrimen vocaret, verum de Aegyptiis etiam male suspicaretur? Quia enim omnis suspiciosus detrectator est in corde suo, facile apparet, Abrahamum hac suspicione detraxisse regi, detraxisse toti Aegyptiorum nationi. Hos enim statuit esse Tyrannos, libidini deditos, et ad caedes perpetrandas maxime paratos; quam praesumptionem inhumanam esse, in aliqua civitate nullum esse pietatis, et iustitiae respectum, antequam eius extiterit documentum, observat *Grot. de Iur. B. et P. Lib. III. Cap. I. §. 7.* Inde adeo mirum quantum Aegyptiis detraxit Abrahamus, quod ipsum novimus peccatum magnum, imo iuxta Apostolum *1. Tim. VI. 4.* capitale esse. Constituit enim se iudicem Abrahamus super Aegyptios, illosque damnat, quod Serva-

toris monito contrariatur, qui iubet, ne quenquam iudicemus, aut damnemus, sed a malignis, sinistrisque iudiciis abstineamus. Infirmirate itaque hic lapsus esse, sibi que timuisse Abrahamum, *Lutherus Com. in Gen. XIX.* iudicat, qui quidem misera illa Sodomitarum ruina sic excruciatum erat, ut etiam tuta timere cogeretur, non tamen propterea excusari prorsus posse videtur, sed in massam peccatricem includendus, et, quod multis quotidie sanctis contingere videmus, raptus occasione fuisse, censendus est. Certe cum caritas non sit suspicax, videtur inique fecisse, Aegyptiisque iniurius fuisse, quod non modo, tanquam profanos DEI contemptores, libidinis eos infimulet, sed etiam suspectos habeat homicidii, a quibus tamen nondum laesus erat.

§. XX.

Praepostera haec animi anxietas, suspicioque fecit, ut alio se vitio implicaret Abrahamus, infidelitate nempe, et diffidentia in DEVM, a quo ne quidem sine suo mendacio, in terra aliena se custodiri posse, putat. Acceperat enim Abrahamus largissimam DEI promissionem: *Benedicam benedicientibus tibi, et maledicam maledicentibus tibi.* Hanc benedictionem datam animo suo radicitus infixam tenere, firmaque cordis fiducia amplecti, nihil ex carnis prudentia suscipere, sed euentum DEO committere debuisset. Sed quaeso quantum a verbo DEI sensus suos deflectat, quando virae suae tantopere metuit, ut eius periculum alio maiori effugere conetur. Non desunt quidem, qui S. Patriarcham excusatum eunt, dicendo, eundem,

eundem, non privato carnis affectu, vitam suam aestimasse, sed, cum effectum divinae vocationis euanescente in morte sua nollet, tanta servandae vitae suae cura tactum fuisse, ut reliqua omnia posthabuerit. Cum enim in se reputarit inclusam esse spem salutis, se fontem esse Ecclesiae DEI, frustra, nisi vivat, sibi, et suo semini, promissam esse benedictionem, laudem hactenus in eo mereri existimant S. virum, quod recto vivendi fine vitam quovis pretio redimere, fuerit paratus. Praecipue vero B. Lutherum in eo totum deprehendimus, qui, Abrahamum non peccasse, nec labasse fidem eius, statuit, sed hoc ipsum consilium ex fide firmissima, et ex Spiritu S. fuisse profectum, iudicat: *Abraham, inquit, plenus fide, etsi pericula varia videt, tamen in solam promissionem respicit, Hanc scit sibi, et suo semini factam, et ut sic dicam, in suo corpore positam. Etsi igitur statuit, DEVM facturum, quod promissit, etiamsi in Aegypto occidatur; tamen sentit, DEVM non tentandum; Quaerit igitur media omnia salutis, s. vitae defendendae, quasi dicat: Non defugio mortem huius corporis, si Domino sic videbitur, et tamen promissio non est per incuriam negligenda, die soll nicht verwahrloset werden. Si possum eam obtinere cum vita, bene est: Sin vita profundenda erit in impia hac gente, Dominus, qui promissionem benedictionis dedit, etiam mortuum me facile excitare poterit. Sed non ideo aliqua salutis via negligenda est. Igitur mea Sara, ne dicas, me esse maritum tuum: Dic, esse fratrem, ita vivam tuo beneficio, tu autem ne dubita, senties Domini auxilium, ne quid patiaris indignum te, et ego quoque, quantum potero, ea in re te adiuvabo apud DEVM verum precibus, qui se promissit cle-*

mentem fore etc. In eadem sententia est *Calvin Com. in G. p. 142.* Quicquid tamen huius rei sit, excusabilis plane S. vir non esse videtur : Si enim de vita sua, in qua videbat fitas esse promissiones divinas de benedicto semine, sollicitus erat, quod iure licuit, saltem debuit suam curam reiicere in DEVM, cui non minus facile fuisset, si una cum uxore Sarai, quod res erat, dixisset, esse inter se vinculum matrimonii, eundem servare a morte, et efficere, ne uxor, quamvis pulcherrima, ab aliquo expeteretur. Vel cum ipse non metueret vitae suae, nisi propter uxorem, quid obstat, quo minus petere a DEO potuisset, ut hominum oculos a pulcritudine Sarai concupiscenda averteret, tum enim causa sublata, effectus etiam sublatus fuisset. Atque ita unica petitione, et uno fidei in DEVM actu, utrique metui praecurrisset. Neque est, quod exinde inferat *Augustinus* Abrahamum si vitam temere profundere, eandemque manifesto exponere periculo voluisset, DEVM tentasse, quando vitae suae, quantum potuit homo, non consulisset : hoc enim pertinere ad sanam doctrinam, ut quando habet, quod faciat, homo, non tentet Dominum DEVM suum. Namque nullam deprehendimus tentationem, si Abrahamus, qui necessitate famis in Aegyptum, fertilitate celebrem, pulcherrimus erat, hac fiducia, et spe se erexisset, DEVM, qui ipsi fuerat autor migrandi, per necessitatem impositam, et quem hactenus habuerat ductorem, non permissurum, ut, vel uxoris causa, vel ulla alia, vita ipsius periclitaretur, cuius posteritati nondum notae promiserat terrae Canaan possessionem. Quanquam itaque

itaque scriptura Abrahamum nobis alias proponat tanquam patrem credentem, et perfectum fidei Exemplar; fides tamen eius aliquantulum hic laborasse videtur: de promissione enim DEI, quod conservaturus, et adiuturus sit in periculo, dubitat, verbum, quod dictum ipsi erat: *In te benedicentur omnes familiae terrae*, ex oculis, et animo dimittit, et, rationi indulgens, de periculis, quae imminebant ipsi, cogitat. Pronunciare igitur possumus, vacillasse Abrahamum, eiusque fidem in tanta periculorum multitudine aliquantulum cessasse, et, uno verbo, particularem lapsum hic negandum non esse, quod ad mortem propinquam trepidans discriminis eventum non commiserit DEO, ne uxoris pudicitiam male proderet. Et si demus etiam, Abrahamum attendisse ad divinitus sibi factam promissionem, quae tantam sollicitudinem, ac curam servandae vitae apud ipsum excitavit, ut omnia potius, quam vitam suam exponere periculo maluerit; ea tamen in parte reprehensione dignus est, quod DEI auxilium patienter non expectans, ad obliquam, illicitamque rationem deflectat. Inde et *Caetanus* scribens in h. l. praecipuam difficultatem in hac conventionē coniugum eam esse, animadvertit, quod conventio talis ordinabatur ad finem illicitum, videlicet coniugium Sarai cum alio viro. Non obstat quidem, fateor, divina providentia, quo minus sibi prospiciant fideles, ita tamen, ut ne praefixas sibi metas transiliant, et ab verbo eius per incogitantiam, captandis illicitis mediis, deflectant. Hinc *Hieronym.* in *Tradit. Ebr. in Gen.* factum hoc foedam necessitatem appellat, docet-

docetque, rectum fuisse Abrahami finem in conseruatione vitae suae, in qua videbat, fitas esse promissiones divinas de benedicto semine; sed in ipsa via aberrasse, ut saepe nobis contingit, etiam cum ad DEVM tendimus, tamen ab ejus verbo per incogitantiam, captandis illicitis mediis, deflectere. Id vero praesertim usu venire in rebus perplexis, quia, dum exitus nullus apparet, facile in varios circuitus abducamur. Quare *Lutherus* ipse, qui alias in mitiorem sententiam pronunciat, et hunc locum ita tractat, ut Abrahamum hic magnitudinem fidei suae magis ostendisse, quam aut peccasse, aut fide in tentatione succubuisse, statuatur, ita tandem concludit: *Quare non excusabimus penitus Abrahamum, sed includemus ipsum quoque in massam peccatricem, sed tamen talem, quae, licet impia non sit, tamen habet in se reliquias peccati. Talia peccata quotidie multa sancti faciunt, nam rapiuntur ipsi quoque occasibus.*

§. XXI.

In eo praeterea Abrahamus minus excusabilis esse videtur, quod uxoris pudicitiam, et fidem conjugalem periculo exponat, quin et ipsam in peccati societatem pertrahat. Hanc enim non modo mentiri, et fallere docet, verum etiam in extremum adulterii periculum perducit, ut, nisi divinitus, adeoque miraculose fuisset prohibitus rex Gerar, matrimonium secundarium, pro more illorum temporum, cum Sara certo certius iniisset. Quod enim existimat *Caietanus*, Abrahamum aequae ac Saram non destitutos, fuisse firmissima in DEVM fiducia, quod pro-

67

prohiberet malum, antequam novum coniugium iniretur, de eo nondum satis constare videtur, unde illis talis fiducia, quam in facto speciali, sine speciali promissione revelata, non certam esse potuisse, supra asseruimus. Quamvis enim Abrahamus, quod aliqui respondent, Propheta fuisse dicatur, adeoque praevidere facile potuerit, fore, ut affligerentur, quicumque sibi, aut uxori iniuriam fecissent, aut facere vellent, eiusque pudicitiam tentare, quodque ea occasio futura esset iustitiae divinae cognoscendae, et timoris Domini in ea regione propagandi; recte tamen observat *Ruvetus*, quod Prophetae non omnia futura intelligant, nec omnia prophetice faciant. Hoc itaque magno vitio non caruit, quod familiam, substantiam, tandem, quod maximum, uxorem quoque, periculo adulterii exponit, et hoc ipso ad adulterium Aegyptios invitat, qui fortasse sibi temperaturi erant a maritata: nunc, cum liberam audiunt, sine peccato eam rapi, et, ob dissimulatum coniugium, nulla opposita difficultate, ex parte mariti, ambiri posse, putant. Quodsi vero quis affirmare velit, Abrahamum, ut vitam suam redimat, uxorem periculo exposuisse, et hactenus in eo non peccasse; sciendum tamen est, licitum nullo modo esse adulterii remedium, vel marito, vel uxori, vitandae alterutrius necis causa, quin potius mortem expectare, vitamque deponere convenit, quam ut eam nobis, aut aliis servemus, id facientes, ex quo DEVS offenderetur. Vitae nostrae, quantum fieri potest, consulere, eandemque non temere profundere possumus, et debemus, ita, ut non omittamus,

mus, quod in nobis est, si qua reperiatur honesta elabendi via; non tamen exinde aliud oriri debet malum, quod hactenus in hoc Abrahami facto manifeste deprehenditur, siquidem ex isto, quem quaerebat, praecavendi, vitamque conservandi, modo, periculum illud infamiae uxoris oriebatur. Centies itaque mortem pius Vir expetere debuisset, quam uxoris suae famam ita proicere, et eius, quam unice amabat, coniugio privari. Plurimorum enim hoc ipso scandalorum autor fuit, cum non omnes hoc consilium intellexerunt, sed in certum periculum adduci coniugem viderunt, quod certe cum Pauli regulam non convenit, qui praecipit, diligendas uxores esse, sicut nostra corpora diligimus. *Anne ergo vel parva, vel pauca peccata sunt, quae hic occurrunt? quaerit Stegmüller. l. supra cit.*

§. XXII.

Ex poena vero Pharaoni, Aegyptiorum regi, a divino Numine propter Sarai, marito suo abductam, inflicta, haut obcurum nobis denuo subnascitur argumentum, cur Abrahamum animadversione quadam dignum pronunciemus. Cum enim S. Patriarcha, propriis consiliis confusus, de periculo uxoris non cogitasset, factum est, ut Sarai a principibus Pharaonis visa, ipsique ex pulcritudine, ac forma regia laudata, in domum regis perduceretur, ipseque propterea, una cum domo sua, a DEO vehementur affligeretur. Vbi quidem DEVS videri poterat iniuste afflixisse, tum Pharaonem ob Sarai, cum videatur innocens, quippe qui, nesciens eam alteri nuptam, legiti-

legitimum eius connubium appetebat; tum eius domum, quae multo magis extra culpam esse videbatur. Sed si probe omnia expendamus, factum regis omni ex parte excusari non potest. Cum enim peccatum istud sit, adspicere etiam alterius uxorem, ad concupiscendam eam; is sane multo magis peccare censendus est, qui illam, quae alterius est, ducere sibi non dubitat. Quod autem nescit Pharaon, Saram non liberam, sed maritatam esse, id illum non a toto, sed a tanto duntaxat excusare potest, cuius cupiditas nihilominus in personam illicitam, et inconcessam ferebatur. Hinc et infra Cap. XX. 3. DEVS Abimelecho legitur minatus fuisse mortem, qui, aequae ac Pharaon, non ex proposito, sed ignorantia deliquerat; quia, si quis ex ignorantia ducat eam, quae est uxor alterius, is certe adulterium committit, quamquam peccatum, ex tali probabili ignorantia commissum, non est coram DEO tam enorme, ut quod ex proposito designatur, atque sic ignorantia a tanto, non autem a toto excusat, *conf. Hunn. Tom. III. Opp. Lat. p. 1592.* Cumque praeterea pluribus iam tunc uxoribus rex abundaret, et, quod leuitatis erat, sola pulcritudinis consideratione ductus, ad Sarai, mulierem ignotam, ac alienigenam, et non nisi alieno iudicio sibi indicatam, animum statim adiiceret, eamque consortem thori deligere vellet, vel ideo poenas divinas haut immerito incurrisse videtur. Accedit, quod et ipse fuerit profanus, et peccatis aliis poenam, plagamque DEI iam ante meritis esset. DEVS itaque occasione hac arrepta, simul in priora eius peccata animadvertit, quemadmodum et in ipsius domum

um seu familiam vindicandi causas iustas, et evidentes habuit, idololatriam scilicet aliaque peccata, quibus dedita erat, *Conf. Hunn. Tom. III. Opp. Lat. p. 1531.* Quod enim aliqui negant, Saram intactam fuisse apud regem Aegypti, id certe non sequitur ex eo, quod *Gen. XII. 19.* dicitur: *Et tuli eam mihi in uxorem.* Haec enim verba Pharaonis non de facto, sed de proposito cum Sarai congregiendi intelligenda esse, dudum observatum fuit. Neque vero etiam ex eo id iudicari potest, quod v. 17. subiicitur *עַל-דָּבָר שָׂרַי* quod quidam ita interpretantur, ac si rem et negotium cum ea habuisset, siquidem notum est, quod hic occurat Pleonasmus, ita, ut vocabulum *דָּבָר* redundet, *עַל דָּבָר שָׂרַי* propter verbum *Sarai*, h. e. propter *Sarai*, *conf. Glass. Lib. III. Phil. Sacr. Tract. I. Can. 38. p. 678. & Tract. III. can. 32. m. 1. p. 848. Lib. V. Tract. I. Cap. III. p. 1463.* Nec denique huc quicquam facere potest, quod Abrahamus a Pharaone fuerit ditatus; id enim factum fuit, ut animum Abrahami, cui uxorem abduxerat, sibi conciliaret. Sufficit, quod afflictus, et percussus rex fuerit a DEO, quod mulierem alienam captam in domum suam abduxisset. Ex quo saltem colligimus, et illum, qui his peccatis, poenisque divinis causam praebuit, utique peccasse, idque ex maxime deliberato consilio, binisque vicibus, ut historia testatur, sic enim non infirmitas, sed peccatum, quo DEVS vere graviter offensus, et ad poenam commotus fuit, appellari meretur. *Conf. Frank. in Vindic. Disp. Theol. in A. C. Disp. X. Thes. 71. et 72. Thumm. in Imp. Phot. p. 326. 329. 330. Rung. in Gen. p. 584.*

§. XXIII.

Ex eo denique, quod altera vice *Gen. XX. 1. seqq.* legitur Abrahamus denuo uxorem abnegasse, apud Abimelechum regem Gerar, non unius peccati insimulari posse videtur. Conspicimus enim, quam facilis eidem obrepat, tum poenarum, tum indulgentiae divinae, oblitio. Nam quod illi in mentem non venit, se DEVM in Aegypto semel tenuisse, nec per suam culpam sterisse, quin uxor Sarai ad alienum virum transfret, in eo excusari nimis crassa socordia non potest. Addimus praeterea, quod et ab ingratitude immunis plane non fuerit Abrahamus: Si enim ingentis periculi, quod sibi in Aegypto, acciderat, non oblitus esset, secumque reputasset, mirabiliter servatam sibi a Domino uxorem esse, nunquam se rursus sciens ac volens in tale periculum coniēcisset. Nunc vero gratiam priorem, divinitus sibi oblatam, quantum in se est, irritam facit, de servanda vita magis, quam uxoris periculo, cogitat, Deique auxilium patienter non expectans, ad illicitam rationem denuo deflectit; hinc reprehensione dignus est.

§. XXIV.

In quibus itaque Abrahamus peccarit, hactenus expeditum a nobis fuit, in S. Patriarcham alias bene affectis, veritatem tamen, et candorem animi, supra omnia amantibus. Quamvis enim *Irenaeo* iudice *Lib. IV. Cap. 50.* eorum, quos Scriptura non increpat, sed simpliciter ponit, nos non debeamus fi-

eri accusatores; praestat tamen Abrahamo maculam imputare, quam legis divinae aciem obtundere, ut scite monet *Dannhaver Colleg. Decal. Disp. VI. p. 457.* Non est enim, quod omnia Patrum facta excusemus, vel omnia, quae a Scriptura commemorantur, probari posse putemus; sed ideo tantum eorum acta utriusque generis maxime insignia afferri, ut sciamus, eos homines fuisse, et, quantumvis essent sanctissimi, lapsos aliquando, saepe per errorem, ut de hoc facto doctissimi Hebraeorum, aliorumque Interpretum credunt, ac statuunt.

SOLI DEO GLORIA.



NOBI-

NOBILISSIMO ORNATISSIMOQUE
DOMINO
RESPONDENTI

AVDITORI SVO VALDE INDVSTRIO

S. P. D.

PRAESES.

ANnus nunc labitur, quod in notitiam
mei pervenisti, cum Tute ingenium
Tuum disciplinae, ac fidei meae, spon-
te credidisses. In quo expoliendo eo
enixius elaboravi, quo maiorem in Te discen-
di cupiditatem, in omnesque occasiones profi-
ciendi ardorem, deprehendi. Talem enim
Te in Scholis, quas intra velum Tibi haecenus
recitavi, praestitisti, ut, sicut Appelles sine li-
nea, sic Tute, sine ingenii exercitio, nullum
facile diem praetermittendum esse existimares.
Ipse nosti, quam mutuis nos inter assidue cer-
tatum fuerit officiis; quum ipse fideliter prae-
cipiendo, moderando, suadendo; Tute cupi-
de imbibendo, consulendo, sciscitando, in am-
plifica-

plificationem doctrinae
Nunc cum autor, suae
tyrocinia studiorum
poris rationem reddere
dires, promptum Te
buiſti, idque voluſti,
eruditorum deducere
minis ducem praeber
tum Tuum ex animi
uberrimoſque induſtri
cleſiam ſuo tempore
Tibi, ac praedico ; Te
rogo, hortorque, ut
quam haud fruſtra an
non modo feliciter
multumque, vincas,
quum eſt, in amoris e
lentiae, ſignificatione
Numen ſanctiſſimis p
diis Tuis, haecenus
poſterum etiam bened
bus cumulatum, ſalu
atque ab iniuria tem
gne, clementerque
bergae Saxonum III.
M DCC XIV.

doctrinae Tuae incumberemus.
tor, suaforque Tibi essem, ut
orum ponereres, locatique tem-
redderes, et in publicum pro-
m Te ad id, paratumque exhi-
olusti, ut ipse Te in palaestram
educerem, primique me certa-
praeberem. Hoc igitur institu-
animi tota mente Tibi gratulor,
industriæ Tuæ fructus, in Ec-
mpore redundaturos, polliceor
lico; Teque simul humanissime
ue, ut expectationem Tuorum,
ultra animo de Te praeceperunt,
liciter sustineas, sed et longe,
vincas, ac superes. Quod reli-
moris erga Te mei, ac benevo-
catione defino, atque aeternum
ssimis precibus obtestor, ut stu-
actenus laudabiliter tractatis, in
m benedicat, Teque, bonis omni-
m, saluum, sospitemque servet,
ria temporum defensum, beni-
erque tueatur! Vale, Vitem-
um III. Kalend. Iunias A. R. G.